

## *Waor of niet waor ?*


Dick van Bloemendaal, tekening deur Gerard Schut

*Hele kleine verhaoltsjes die soms warkeluk gebeur bin en verhaoltsjes die ik uut mun duum 'ezeugen het. Vur julie un vraag, mar vur mien un weet, welke wel of niet waor bin.*

### *Kotsmisseluk*

Toen ik zo'n jaor of zeuventien was han we in de zoemer un paor jongetjes vur un week te logeren. Twee mannetjes van umstreeks twaolf jaor, Dirk van de Bunt, un neefje uut Maartensdiek en Joop Hagens, un zoontje van kennissen uut Vlaordingen. Ze kossen goed mit mekaar overweg en han samen de grootste lol. Op un margen zat ik un sigret te roken en dat wouwen die jonges ok wel us pruberen, mar ik zei dat dat nie kos umdat Poetje niet hen wou dat ze rookten.

Toen Poetje naor boven ging um de bedden op te maken en ging zuugen en stoffen, zagen de jonges hun kans schoon en wilden ze mit alle geweld roken. Um de beurt moggen ze un trekje doen an mien sigret, mar ze zeugen iets op en dan blaosden ze ut tegeliek weer uut. Dat vun'k niks, ze mossen un goeie zeug nemen en die



zo diep naor binnen haolen dat ze ut in dur teeën kossen veulen. Ik was zo gemeen da'k ze tegen mekaar uut-speulde, wie de langste zeug kos maken mog nog un extra keer. Nou, dat was niet

tegen dovemansoren 'ezeid, Dirk nam as eertse un beste zeug die hie goed naor binnen haolde en toen weer uutblaosde. Toen was Joop an de beurt en die nam ok un beste zeug over z'n longen tot onder in z'n grote tee. Dirk was de winnaar en mog nog un zeug nemen en Joop was un goeie tweede en mog ok nog us effe an m'n sigret zuugen. Effe laoter waren ze allebei zo wit as un vaotdoek en zo misseluk as un kat. Opeens mos Joop overgeven en Dirk kwam dur geliek achteran. Ze vleugen naor de geutsteen in de keuken en daar kotsten ze alles wat ze in dur lief han dur uut. Krek op dat moment kwam Poetje van boven of en zag wat of dur an de hand was. Toen ze vreug wat of dur gebeurd was hen de jonges ut allemaol an dur verteld. Blenders, wat was ze kwaod en wat dee ze lilluk tegen mien. Vur straf mos ik de boel opruumen en alles netjes schoon maken. Wat ha'k toen un spiet da'k die jonges het laoten roken.

+++